



საქართველოს გარემოს დაცვისა და სოფლის მეურნეობის მინისტრი

ბრძანება N 2-1274

27/12/2019

ქ. თბილისი

თეთრიწყაროს მუნიციპალიტეტში, სოფ. მარაბდაში შპს „თი ეს გრუპის“ ცემენტის საწარმოს მოწყობასა და ექსპლუატაციაზე სკრინინგის გადაწყვეტილების შესახებ

საქართველოს გარემოს დაცვისა და სოფლის მეურნეობის სამინისტროში გზმ-ის ჩატარების საჭიროების დადგენის მიზნით შპს „თი ეს გრუპის“ მიერ წარმოდგენილია თეთრიწყაროს მუნიციპალიტეტში, სოფ. მარაბდაში ცემენტის საწარმოს მოწყობისა და ექსპლუატაციის სკრინინგის განცხადება.

წარმოდგენილი დოკუმენტაციის მიხედვით, საპროექტო ტერიტორია მდებარეობს თეთრიწყაროს მუნიციპალიტეტში, სოფ. მარაბდაში, არასასოფლო სამეურნეო დანიშნულების მიწის ნაკვეთზე ს/კ 84.24.31.135, რომელიც წარმოადგენს შპს „თი ეს გრუპის“ საკუთრებას. აღნიშნული ტერიტორიის ფართობია 22821 მ². დაგეგმილი საწარმოს ტერიტორიიდან უახლოესი დასახლებული პუნქტი დაშორებულია 650 მეტრით, ხოლო ფონიჭალა-მარნეული-გუგუთის გზა დაშორებულია 250 მეტრით.

სკრინინგის განცხადების მიხედვით, საპროექტო ტერიტორიაზე იგეგმება არსებული ძველი შენობის რეკონსტრუქცია/დემონტაჟი და ახალი ნაგებობების მოწყობა. საწარმოში დაგეგმილია ცემენტის წარმოება (პორტლანდცემენტი-მარკა „400“ და „300“), კლინკერის, თაბაშირის და დანამატების დაფქვით.

საწარმოში დაგეგმილია 8 ერთეული ცემენტის სილოსის მოწყობა, თითოეულის მოცულობა შეადგენს 200 ტონას. ასევე მოეწყობა საკონტროლო გამშვები პუნქტი. ტერიტორიაზე არსებულ შენობებში (3168.45 მ² ფართობის) განთავსებული იქნება ცემენტის დაფქვისთვის საჭირო ბურთულებიანი წისქვილი (10 ტ/სთ წარმადობის) და ნედლეულის საწყობი. საწარმოში ასევე განთავსდება კლინკერის საფქვავე წისქვილი.

ცემენტის წარმოებისათვის საჭირო ნედლეულის (კლინკერი, თაბაშირი, დანამატები, ბრძმედის გრანულირებული წიდა) საწარმოში შემოტანა მოხდება ავტოტრანსპორტით, რომელიც განთავსდება სასაწყობო ბეტონის მოედანზე ცალ-ცალკე ნაყარის სახით. სასაწყობო მოედანზე განთავსებულ ბუნკერებში ავტოჩამტვირთავის საშუალებით მოხდება კლინკერის და დანამატების ჩატვირთვა. აღნიშნული ბუნკერების ქვეშ არსებულ ტრანსპორტიორზე ნედლეულის დოზირება ხდება ავტომატური სასწორის საშუალებით. შეზავებული ნედლეული თავსდება წისქვილში. დაფქვილი ცემენტი გადადის ელევატორში, სადაც მას ემატება სახელოებიან ფილტრებში დაჭერილი ცემენტი და საბოლოოდ თავსდება ცემენტის სილოსებში.

საწარმო აღჭურვილი იქნება აირგამწმენდი ორსაფეხურიანი დანადგარებით, ციკლონით და სახელოებიანი ფილტრებით. გაწმენდის შემდეგ ატმოსფერულ ჰაერში გაფრქვევა მოხდება 10 მეტრი სიმაღლის და 0,7 მ დიამეტრის მქონე მილით. აირგამწმენდი სისტემისათვის ჰაერის მიწოდება მოხდება საკომპრესორო სადგურიდან.

საწარმოში წარმოებული პორტლანდცემენტი მიიღება კლინკერის, მინერალური დანამატების, თაბაშირის და ბრძმედის გრანულირებული წიდის დაფუძვით. წარმოებული პროდუქციის შეფუთვა მოხდება 50 კგ-იან ტომრებში და ასევე რეალიზაცია ნაყარის ნახით. საწარმოში წელიწადში დაგეგმილია 66 000 ტონა ცემენტის წარმოება. აღნიშნული წარმოებისათვის გამოიყენება 52800 ტონა კლინკერი, 3300 ტონა თაბაშირი და 9900 ტონა დანამატი. საწარმო იმუშავებს დღეში 20 საათი, 330 დღე წელიწადში.

საწარმოში წყლის გამოყენება მოხდება მხოლოდ სასმელ-სამეურნეო და სახანძრო მიზნებისთვის. ტექნოლოგიურ პროცესში წყალი არ გამოიყენება. საყოფაცხოვრებო-სამეურნეო წყლები საკანალიზაციო სისტემით ჩაშვებული იქნება ტერიტორიაზე მოწყობილ ბეტონის ამოსაწმენდ ორმოში, რომლის გავსების შემთხვევაში გატანილი იქნება სპეციალური ავტოტრანსპორტით ხელშეკრულების საფუძველზე. სკრინინგის განცხადებაში არ არის აღწერილი, საწარმოს ტერიტორიაზე წარმოქმნილი სანიაღვრე წყლების მართვის საკითხები.

სკრინინგის განცხადების თანახმად, საწარმოს ექსპლუატაციის ეტაპზე მოსალოდნელია საყოფაცხოვრებო ნარჩენების წარმოქმნა. ასევე მოწყობის ეტაპზე მოსალოდნელია სამშენებლო მასალების წარმოქმნა ნარჩენების სახით, ვინაიდან ხდება ტერიტორიაზე არსებული შენობის რეკონსტრუქცია/დემონტაჟი. საწარმოს ტერიტორიაზე მოწყობილი იქნება ნარჩენების განთავსების უბნები. საყოფაცხოვრებო ნარჩენების (11,68 მ³) გატანა მოხდება დასუფთავების სამსახურის მიერ. შეგროვებული სახიფათო ნარჩენების დროებითი შენახვის შემდეგ, გადაეცემა შესაბამისი ნებართვის მქონე კომპანიას.

წარმოდგენილ სკრინინგის განცხადებაში ასახულია საქმიანობასთან დაკავშირებული შესაძლო ავარიის ან კატასტროფის რისკები, ხანძარსაწინააღმდეგო ნორმები და აღნიშნული საწარმოს მსგავსი საქმიანობებისათვის განსაზღვრული უსაფრთხოების ნორმები.

საწარმოს ფუნქციონირებისას არ არის მოსალოდნელი კუმულაციური ზემოქმედება, რადგან მის სიახლოვეს არ ფუნქციონირებს მსგავსი ტიპის საწარმოები.

სკრინინგის განცხადების მიხედვით, ვიზუალური შეფასებით, ტერიტორიაზე ისტორიულ-კულტურული მემკვიდრეობის ძეგლები არ ფიქსირდება.

სკრინინგის განცხადებაში არ არის მოცემული, საიდან რა სიხშირით/სქემით და გზებით მოხდება საწარმოს ფუნქციონირებისთვის აუცილებელი მასალების შემოტანა/წოდების გატანა და აღნიშნულიდან გამომდინარე არ არის განხილული ზემოქმედების საკითხი, რაც საჭიროებს შესწავლას.

ვინაიდან საწარმოში დაგეგმილია ცემენტის სილოსების (8 ერთეული) მოწყობა და ასევე დამატებითი ნაგებობების განთავსება, რაც დაკავშირებულია ნიადაგის ნაყოფიერი ფენის მოხსნა/განთავსებასთან, აღნიშნული საკითხი მოითხოვს დამატებით შესწავლას.

საწარმოს ექსპლუატაციის ეტაპზე ტექნოლოგიურ პროცესში გამოყენებული დანადგარებიდან მოსალოდნელია ხმაურის გავრცელება. ხმაური ასევე შესაძლებელია

გამოიწვიოს ნედლეულის შემოზიდვა-დასაწყობებამ და აღნიშნული პროცესის დროს ავტოტრანსპორტის მუშაობამ. საქმიანობის სპეციფიკიდან გამომდინარე ექსპლუატაციის ეტაპზე ასევე მოსალოდნელია ატმოსფერული ჰაერის დაბინძურება. ატმოსფერული ჰაერში გავრცელებული მავნე ნივთიერებებია: ინერტული მასალებისა და ცემენტის მტვერი. ზემოაღნიშნულიდან გამომდინარე, ასევე საწარმოს მასშტაბის გათვალისწინებით (66 000 ტ/წელ), მოსალოდნელია ზემოქმედება ატმოსფერულ ჰაერზე, რაც საჭიროებს დამატებით შესწავლას და შეფასებას.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება გამოქვეყნდა სამინისტროს ოფიციალურ ვებგვერდზე და თეთრიწყაროს მუნიციპალიტეტის მერიის საინფორმაციო დაფაზე. საზოგადოების მხრიდან აღნიშნულ საქმიანობასთან დაკავშირებით წერილობითი შენიშვნები და მოსაზრებები არ ყოფილა წარმოდგენილი.

ყოველივე ზემოაღნიშნულის, საწარმოს სპეციფიკის და საქმიანობის მასშტაბის (66 000 ტონა წელიწადში) გათვალისწინებით, მოსალოდნელია მნიშვნელოვანი ზემოქმედება გარემოს სხვადასხვა კომპონენტებზე, რაც საჭიროებს დამატებით შესწავლას და შეფასებას.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსი“-ს მე-7 მუხლის მე-6 ნაწილის და ამავე კოდექსის II დანართის მე-5 პუნქტის 5.4 ქვეპუნქტის საფუძველზე,

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, რომ თეთრიწყაროს მუნიციპალიტეტში, სოფ. მარაბდაში შპს „თი ეს გრუპის“ ცემენტის საწარმოს მოწყობა და ექსპლუატაცია დაექვემდებაროს გარემოზე ზემოქმედების შეფასებას;
2. შპს „თი ეს გრუპი“ ვალდებულია უზრუნველყოს „გარემოსდაცვითი შეფასების კოდექსის“ მე-8 მუხლით დადგენილი სკოპინგის პროცედურის გავლა;
3. ბრძანება დაუყოვნებლივ გაეგზავნოს შპს „თი ეს გრუპს“;
4. ბრძანება ძალაში შევიდეს შპს „თი ეს გრუპის“ მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში გადაწყვეტილება განთავსდეს სამინისტროს ოფიციალურ ვებგვერდზე და თეთრიწყაროს მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი

მინისტრი